

De Zóezers:

In gesjprek met de Fös, de Lange, Piet en de Greek..., ofwaal Ed Faassen, Luc Thijssen, Peter Thijssen en Rob Greijn, Zóezers van 't ierste oor, ouchwaal de 'Padres de familias' genump.

Vurdet ich uch beste laezers verder op de huégte sjtel van dit gesjprek, wil ich gaer efkes get óet de deuk doon euver de naam van dezen illustere groep. In 1986, ten tiède van eur ierste lustrum, woorte zeej al aan uch veurgesjteld in de Oeleskrant. Met behuúp van 't Tegels dialek heb ich get opgezôch um get deepgangk te kenne kriége en det liért 't volgende: 'Zóeze is sjnel wie 'ne piél door de lôch vleege'.

Det rup de vraag op of zeej soms hoëgvleegers zien. Of hebbe zeej zoë vuël piële op d'm baog of kên-se op eur genne piël trekke? Of 'nne gifpiël aafsjeete? Maar ouch zoë iets van 'd'm baog ken neet altiéd aeve gesjpanne bliëve...?' en 'op wat zeej vertelle ken-se genne pië trekke...?' Niks bleek minder waar...!

Vanaaf 1981 (sjpontaan opgerich en ôndangks vuële wisselinge - d'r ginge regelmaotig sjlumme Zóezers elders sjtudeere - 'nne vaste piéler in de groëte Tegelsen optoch. Begôs op de Viéverlaan, ônger de rouk van kefee de Bôl en alwir vanaaf 1989 in de loods van de Fös aan de Tegelsewaeg in sjtadsdeil Geloë. Ôngertösse redelik sjtabel met ein gemiddelde bezetting van 12 kinger, 12 vrouwluuj en 12 kaerels, zegk maar tösse de 30 en 40 leeje. Gluivend in d'm oolevaar wuért de meiste nachwuchs verwach van kinger. Kortum ein gezônge vereniging.

Rôngkborstig wie de kaerels zien, vertelle zeej

aopenhertig det zeej noëijts hadde verwach det zeej 't zoë lang zouwe volhaaje. Bliékbaar ken det toch waal en den te bedinke det d'r gen echte sjatuute besjtaon, gen bezjwaorekemmissie of iets dergeliks is, maar waal 't fenomeen van waekeliks ein glaeske beer drinke in ein of angere Tegelse of Sjteylerse lokaliteit en den natuurlik eur jaarlikse leejevergadering. Euver 't bouwe kôm ich dalik te sjpraeke.

Sjtraevele

Vas rituweel van dees leejevergadering is 't in Tegele alom bekende sjtraevele. 't Jaarlikse vastelaovesmotto, vas agende punt, kên den waal óetgangspunt zien vur nieje ideeje, maar dao kump ouch waal ens get anders óet. Det geldt min of miér ouch vur 't bouwe zelluf. Dök wuért ein tekening gemak maar al doon-'t-zelvend, kump d'r waal ens gans get anders óet de bös. Of 'as de ratte 't zingkende sjeep môtte verlaote', 't aanvangkelikke motto, den kômme d'r pingwins te veursjien. Maar wiej den ouch, as de planne óeteindelik vaste vorme hebbe aangenaome gaon de dames (de pakkekemmissie) d'r op óet um sjtufke te koupe, knip-petroëne te make op de maot van de leeje, vervolges wuért d'r gereege en óeteindelik waere alle ôngerdeile inein geneijd (hoëg Singermesjién-nivo).

Al dees eurkes bringe de sjtumming d'r good in en de vrindegroep greujt wir hechter. Dit letste gebeurt ouch in de bouwloëds. Kaaje heng, vuël werme kôffie met bruedjes en pepeer masjee,





AL 22 JAOR 'FLITSEND'

latte zaage, plenk naegele, sjildere en vuël techniek oppe waage, want confettiesjeete is ein van eur handelsmerke/hoëgsjtandjes. D'm beejnaam 'Ketông' vur 'nne persoën in eur mitte sjteit neet allein borg vur deze confettie maar ouch vur de neet miër weg te dingke beerviltjes met dao op eur logo. Geej wet waal "Weej gaon nag vur ein røndje".

Ouch de Zóezers waere sjteeds profesjoneler, maar eure draif is neet om d'n iërste priës te môtte haole, maar gewuën meijdoon. De vrindeklöp is immers wars van formaliteite, maar lol en plezèer sjteit hoëg in 't vandael. (As sjriëver deezes wil ich neet onvermeld laote det zeej ôngertösse alle soarte priëze die d'r te winne zien ein of miërdere kiëre binnegehaold hebbe). Dit veurletste (vrindeklöp) blik waal ôet 't feit det zeej (as ein van de mede-oprichters) lid zien van 't groete waagebouwerskollektief. Ôngerlinge ôetwisseling van zaake, ervaringe, organisaasiej van 't jaorlikse Bouwersbal en baovenal 't ôngerstjeune op vuël frônte (kennis, matriejale, ervaring en cente) van nije waagebouwers en korte gôjje liëne met de optochkemmissie van Vg. D'n Oeles.

En den de apothéjooze

Vastelaovesmaondig. De waage wuërt nao bóete gereeje. Alle platgebouwde, groëtere ôngerdeile waere rechop gemonteerd en de techniek wuërt aangesjlaote. D'n iërste waage waas 6.00 maeter hoëg en viéja 12.00 maeter woort ens d'n top van 15.00 maeter gehaold. Dae zellufden daag krúup bóetelenger Wim (Ijsselstein ôet Leiderdorp) wiej jidder jaor, achter 't sjteur van de traktor. Alle deilnimmers waere gesjmienk en

me geit opsjtelle oppe Kerkhaoflaan. Zoëlang as d'n diesel neet bevroore is den geit ouch det, wie gewuën, 'wie am sjnuurschen'.

Aswoensdaag wuërt d'r geliëk ge-evalueerd, de waage aafgebraoke en is t'r kôffie met vlaai (toet vur ingkele jaore beej Sjanet van de Bôl).

Kôs me in de beginjaore nag truuk valle op sjpôn-sors, nôw driëve zeej oppe kontriëbuusie van de eige leeje en beejdrage van Vg. D'n Oeles. Verder meug neet ônvermeld bliëve det d'r vur de cohesie van de klöp jaorliks ein ôetsjtepke wuërt georganiseerd. 't Eine jaor met en 't angere jaor zônger de kinger. Ouch heejbeej sjtaon diverse motto's centraal. Neet allein culinaire, maar ouch culturele verpozinge.

Euver 't kômmende 22^o optraeje zjwiëge de hiëre as 't graaf, maar de twinkelende uigskes sjpraake bookdeile. Of euren eige internet-sait:

www.zoerzers.com - veuraaf ein tipke van de sjluier zal oplichte môt geej, laezer, zelf maar ôngerzeuke. Maar nag baeter is as geej maondig-middaag zelluf nao d'n optoch gaot kiëke.

Vanaaf dees plaats haop ich det de Zóezers nag lang van zich laote huëre en ich wins idderein eine sjoëne vastelaovend en met d'n optoch vuël kiek- en luusterplezèer en baovenal de Zóezers vuël súkses.

Hans Janssen